

**CONSELLERÍA DE PESCA
E ASUNTOS MARÍTIMOS**

Orde do 29 de setembro de 2008 pola que se fai pública a ampliación do importe existente para a concesión de axudas á paralización definitiva dos buques pesqueiros, convocadas pola Orde do 23 de abril de 2008.

A Orde do 23 de abril de 2008, pola que se establecen as bases reguladoras para a concesión, en réxime de concorrencia competitiva, das axudas á paralización definitiva dos buques pesqueiros, e se convocan para o exercicio 2008 (DOG nº 84, do 2 de maio) establece no seu artigo 4º o importe da contía máxima das axudas que ao seu abeiro poderán ser concedidas aos solicitantes.

Ante o contexto da actual situación económica do sector pesqueiro, con problemas non só conxunturais, senón tamén de carácter estrutural, as medidas relacionadas co axuste da capacidade pesqueira á situación dos recursos adquiren unha maior relevancia. Neste contexto, e á vista de que as previsións iniciais noutras medidas financiadas polo Fondo Europeo da Pesca non se van cumprir na súa integridade, levouse a cabo unha reasignación de recursos, incrementando a dotación inicialmente prevista para a paralización definitiva. Consecuentemente, o importe inicialmente dotado para a orde de axudas do 23 de abril de 2008 pode ser incrementado, o que permitirá ofrecer axudas a un maior número de beneficiarios.

Tendo en conta o indicado no artigo 4.2º da Orde do 23 de abril de 2008, o crédito inicial poderá ser ampliado en función das disponibilidades orzamentarias sen que iso dea lugar á apertura dun novo prazo de presentación de solicitudes, salvo indicación expresa en contrario na orde que se publique para o efecto.

Considerando todo o dito anteriormente é polo que cómpre ampliar o importe da contía máxima das axudas que poderán ser concedidas ao abeiro da referida Orde do 23 de abril de 2008, coa finalidade de ofrecelas ao maior número de beneficiarios posible.

Por todo o exposto e en uso das facultades que me foron conferidas

DISPOÑO:**Artigo único**

Primeiro.-Amplíase o importe da contía máxima das axudas que se van conceder ao abeiro da Orde do 23 de abril de 2008 (DOG nº 84, do 2 de maio) en 10.000.000 euros, con cargo á aplicación 14.03.723A.770.1 dos orzamentos xerais da Comunidade Autónoma de Galicia para o ano 2008.

Segundo.-Esta modificación non afecta o prazo establecido na referida orde para a presentación de solicitudes.

Disposición derradeira

Única.-Esta orde producirá efectos a partir do día seguinte ao da súa publicación no *Diario Oficial de Galicia*.

Santiago de Compostela, 29 de setembro de 2008.

María Carmen Gallego Calvar
Conselleira de Pesca e Asuntos Marítimos

**EMPRESA PÚBLICA DE OBRAS
E SERVIZOS HIDRÁULICOS**

Resolución do 2 de outubro de 2008 pola que se lles dá publicidade aos convenios de colaboración subscritos por este ente público no segundo cuadrimestre do ano 2008.

O artigo 11 da Lei 4/2006, do 30 de xuño, de transparencia e boas prácticas na Administración pública galega (DOG nº 136, do 14 de xuño) establece que as entidades públicas vinculadas ou dependentes da Comunidade Autónoma de Galicia deberán publicar cuadrimestralmente no *Diario Oficial de Galicia* unha relación cos convenios de colaboración asinados no cuadrimestre anterior.

Polo que antecede, en virtude das facultades que teño concedidas,

RESOLVO:

Facer pública a relación dos convenios subscritos pola Empresa Pública de Obras e Servizos Hidráulicos durante o segundo cuadrimestre do ano 2008, que se incorpora como anexo a esta resolución.

Santiago de Compostela, 2 de outubro de 2008.

José Luis Romero Valeiras
Presidente da Empresa Pública de Obras
e Servizos Hidráulicos

ANEXO**Convenios de colaboración subscritos pola Empresa Pública
de Obras e Servizos Hidráulicos durante o segundo
cuadrimestre do ano 2008**

-Addenda ao convenio de colaboración entre a Empresa Pública de Obras e Servizos Hidráulicos, o Instituto Galego da Vivenda e Solo e o Concello de Begonte para o remate das obras do proxecto de subministración e estación de tratamento de augas potables do parque de reserva empresarial no concello de Begonte.

-Convenio de colaboración entre a Empresa Pública de Obras e Servizos Hidráulicos e o Concello de Pontevedra para a execución das obras de infraestruturas hidráulicas en parroquias do concello de Pontevedra. Fase 1.

-Addenda ao convenio de colaboración entre a Consellería de Medio Ambiente e Desenvolvemento